

A la tschertga da suprastants per la Lia

Las trais uniuns regionalas han il dretg da mintgamai in sez

DA CLAUDIA CADRUVI / ANR

■ **Sper il presidi da la Lia rumantscha èsi d'occupar da nov a partir dal 2013 trais sez en suprastanza. L'elecziun ha lieu ils 27 d'october. Las uniuns affiliadas regionalas preparan propostas. Nums na vul ins tradir nagins.** La suprastanza da la Lia dumbra tschintg commembers – quatter chalan la fin da quest onn. Betg mo per il president *Vincent Augustin* scada il temp d'uffizi, mabain era per ils trais suprastants *Men Janett*, *Luzia Plaz* ed *Erwin Vincenz*. Ils statuts lubechan be trais periodas d'uffizi da trais onns. Il sulet suprastant che na saja anc betg nov onns en uffizi e che candideschia puspè saja *Jon Carl Tall*, di *Andreas Gabriel*, pledader da la Lia.

Ils trais suprastants partents reprechentan la Surselva Romantscha, l'Uniun dals Grischs e l'Uniun Rumantscha Grischun Central. Questas trais uniuns affiliadas han il dretg d'occupar mintgamai in sez en suprastanza.

Surmir e Sutselva

«Da nossa regiun fa part era l'Alvra e cun Schons era la Sutselva», di *Filip Dosch* che presidiescha l'Uniun Rumantscha Grischun Central. Perquai che *Luzia Plaz*, la suprastanta partenta, deriva dal Surmir hajan ins vuli surschar la candidatura questa giada a la Sutselva. Ma en lezza regiun n'hajan ins chattà nagin candidat che stess a disposiziun.

Perquai hajan ins cuntinuà a tschertgar en il Surmir e la finala chattà ina persuna, di *Dosch*. Per il mument na veglia el tradir anc nagins nums. L'uniun fetschia sia nominaziun a chaschun da la radunanza extraordinaria l'entschatta d'october. I saja



Tgi occupa ils trais sez vacants en la suprastanza da la Lia Rumantscha?

FOTO N. SIMMEN

pussaivel ch'i dettia ord il ravugl da la radunanza anc autras propostas.

Per il post dal suppleant – che remplazza il suprastant – hajan ins en senn da purtar insatgi da la Sutselva, di *Dosch*.

Ils Grischs

Era la suprastanza da l'Uniun dals Grischs ha fatg sias ponderaziuns e tschertgà ina persuna. «Tut è pront», di la presidenta *Maria Sedlacek*. Ma exact sco *Dosch* na tradescha ella nagins nums. Ils 12 da settember fetschia l'uniun sia radunanza extraordinaria da nominaziun. Quel di proponia la suprastanza mintgamai in candidat u ina candidata tant per il presidi sco

era per la suprastanza da la Lia. «Nus fashain ina proposta per discutir», di *Sedlacek*. La presidenta n'excluda betg ch'i dat forsà anc autras propostas a la radunanza da nominaziun.

Surselva

La Surselva Romantscha n'haja per il mument planisà nagina radunanza extraordinaria da nominaziun, di *Rino Darms*, co-president da l'uniun regiunala. Ina tala fashess ins sulet, sch'ins less proponer insatgi per il presidi da la Lia. «Lura clamassan nus anc ina giada ensemen noss commembers per avair il suletg da la basa», di *Darms*.

En ina sesida la fin d'ost veglia la suprastanza da la Surselva Romantscha tractar la dumonda davart in candidat u ina candidata per la suprastanza da la Lia. I dettia già in'idea, tgi ch'ins less proponer, ma la discussiun en suprastanza n'hajan ins anc betg fatg.

Circa sis sesidas l'onn

La suprastanza da la Lia è sa radunada ils ultims onns trais fin quatter giadas l'onn, di *Andreas Gabriel*, pledader da la Lia. Plinavant fetschia la suprastanza part da la sesida dal cussegl da la Lia e da la radunanza da delegads, uschia ch'i sa resultia circa sis sesidas l'onn.

Las schurnadas cumportian tranter 125 e 300 francs – tut tenor durada d'ina sesida u incumbensa. Làtiers vegnian restituids custs per spesas.

Tgi elegia?

Ils delegads da las uniuns affiliadas elegian la suprastanza ed il president da la Lia rumantscha.

Ensemen cun il president dumbra la suprastanza tschintg commembers. Per mintga suprastant vegn anc tschernì in suppleant u ina suppleanta.

Ils tschintaments da la Lia enumereschon il dumber da delegads u delegadas che mintga uniun affiliada dastga tarmetter a la radunanza. Qua la survista:

Uniun affiliada **dumber da delegads**

Surselva Romantscha	15
Uniun dals Grischs	10
Uniun Rum. Grischun Central	8
Societad Retorumantscha	4
Uniun per la Litteratura Rum.	4
Cuminanza da radio e televisiun	4
Giuventetgna Rumantscha	4
Uniun dals Rumantschs da la Bassa	3
Quarta Lingua	3
Agentura da novitads rumantscha	2
Gruppa rum. dal cussegl grond	8